



Siunnersuut uunga Kalaallit Nunaanni sulinermi ajoqusernermut isumannaarineq pillugu inatsisip allanngortinneqarnissaanut pillugu inatsisissamut Siunnersuummut Namminersorlutik Oqartussat akuersissuteqarnissaat pillugu Inatsisartut aalajangiiffigisassaannut siunnersuut (Nalunaarutiginninnermut malittarisassanik naligiissaarineq, sulinermi ajutoornerit il.il. pineqartillugit akuersaarnissamut apeqquummik sukangannginnerusumik nalilersuineq)
(Isumaginninnermut, Ilaqutariinnermut, Suliffeqarnermut Nunamullu Namminermut Naalakkersuisoq)
(Siullermeerneqarnera)

Qujanaq Naalakkersuisut siunnersuutip pingaaruteqartup saqqummiunneranut, sulisunut tamanut pingaaruteqarluinnartumut.

Aallaqqaasiutitut oqarlanga, Demokraatit allannguutissatut siunnersuutigineqartut tamaasa tapersermatigit. Soorlu assersuutitut pitsaalluinnartutut isigaarput, nutamik inatsisiliornermi imaalissamat, ajoqusernerit iluaalliuutaasut, sulinermi pisut, ullumikkorniit sulinermut atatillugu ajoqusernertut akuerineqarnerulissammata.

Taamatutaaq iluarisimaartorujussuarput, taarsiissutip naatsorsorneqartarnerata nutarterneqarnissaa imaalillugu, ajoqusernut tamarmik ullumimut naleqquttumik taarsiivigineqartalerlutit ataatsikkut akiliutigineqartumik taarsiivigineqarunik imaluunniit naliginnaasumik taarsiivigineqarunik assigiimmik.

Taamatut oqareerluta, erseqqissaatigissavarput, inatsit tamaat isigissagaanni inatsimmi tarnikkut sulinermi ajoqusernerit pineqarpiangimmata.

Maannakkut inatsimmi aammalu maannakkut malittarisassaasuni unammillernarnerpaat ilagaat tarnikkut sulisilluni ajoqusernerit akuerineqarneq ajornerat, sulinermut atatillugu pinngoraangata. Tamanna pingaartumik immikkoortuni soorlu psykiatrimmi aammalu pisortat suliffeqarfiini allani, sulisut akuttunngitsumik persuttarneqarnissamik soorasaarneqarlutillu toqunneqarnissamik soorasaarneqartarmata. Ajoqusernerit taamaattut tarnikkut peqqissutsimut imaannaanngitsorujussuarmik kingunerluuteqarsinnaapput, taamaakkaluartorli ajornarluinnangajalluni tarnikkut sulinerup nalaani ajoqusernertut akuerineqarnissaat.

Neriuppunga, Naalakkersuisut ataatsimiititaliallu una iluatsillugu unammillernartoq taanna oqaasinnguiffigisagaat suliniutillu pisariaqartut aallartillugit malittarisassanik maleruagassanillu pisariaqartunik sinaakkusersuisoqarnissaanut, innuttaasut sulinermut atatillugu tarnikkut ajoqusersimasut akuerineqarnissaat qulakkeerniarlugu.

Taamatut oqaaseqarluta siunnersuut akuereqqullugu innersuussutigaaarpud ataatsimiititaliamilu susassaqartumi suliareqqinneqarnissaa innersuussutigalugu.